

Ս. Ներսես Շնորհալի

Ա

Հաւատով խոստովանիմ եւ երկիրպագանեմ քեզ,
Հայր եւ Որդի եւ Սուրբ Հոգի,
անեղ եւ անմահ բնութիւն,
արարիչ հրեշտակաց եւ մարդկան եւ ամենայն եղելոց.
ողորմեա քո արարածոց եւ ինձ բազմամեղիս:

Բ

Հաւատով խոստովանիմ եւ երկիրպագանեմ քեզ,
անբաժանելի լոյս, միասնական սուրբ երրորդութիւն եւ մի աստուածութիւն,
արարիչ լուսոյ եւ հալածիչ խաւարի.
հալածեա ի հոգւոյ իմմէ զխաւար մեղաց եւ անգիտութեան,
եւ լուսաւորեա զմիտս իմ ի ժամուս յայսմիկ աղօթել քեզ ի հաճոյս,
եւ ընդունել ի քէն զխնդրուածս իմ.
եւ ողորմեա քո արարածոց եւ ինձ բազմամեղիս:

Գ

Չայր երկնաւոր Աստուած ճշմարիտ,
որ առաքեցեր զորդիդ քո սիրելի ի խնդիր մուրրեալ ոչխարին,
մեղայ յերկինս եւ առաջի քո,
ընկալ զիս որպէս զանառակ որդին,
եւ զգեցո ինձ զպատմութեանս զառաջին զոր մերկացայ մեղօք.
եւ ողորմեա քո արարածոց եւ ինձ բազմամեղիս:

Դ

Որդի աստուծոյ, Աստուած ճշմարիտ,
որ խոնարհեցար ի հայրական ծոցոյ,
եւ առեր մարմին ի սրբոյ կուսէն մարիամայ վասն մերոյ փրկութեան,
խաչեցար, թաղեցար եւ յարեար ի մեռելոց,
եւ համբարձար փառօք առ հայր.
մեղայ յերկինս եւ առաջի քո,
յիշեա զիդ որպէս զաւագակն յորժամ գաս արքայութեամբ քով.
եւ ողորմեա քո արարածոց եւ ինձ բազմամեղիս:

Ե

Չոգի աստուծոյ, Աստուած ճշմարիտ,
որ իջեր ի յորդանան եւ ի վերնատունն,
եւ լուսաւորեցեր զիս մկրտութեամբ սուրբ աւագանին.
մեղայ յերկինս եւ առաջի քո,
մաքրեա զիս վերստին աստուածային հրով քո՝
որպէս հրեղէն լեզուօք սուրբ զառաքեալսն,
եւ ողորմեա քո արարածոց եւ ինձ բազմամեղիս:

2

Անեղ բնութիւն, մեղայ քեզ
մտօք իմովք, հոգևով եւ մարմնով իմով.
մի՞ յիշեր զմեղս իմ զառաջինս վասն անուանդ քում սրբոյ.
եւ ողորմեա քո արարածոց եւ ինձ բազմամեղիս:

Է

Տեսող ամենայնի, մեղայ քեզ
խորհըրդով բանիւ եւ գործով.
ջնջեա զձեռագիր յանցանաց իմոց,
եւ գրեա զանուն իմ ի դպրութիւն կենաց.
եւ ողորմեա քո արարածոց եւ ինձ բազմամեղիս:

Ը

Քննող գաղտնեաց, մեղայ քեզ կամաւ եւ ակամայ,
գիտութեամբ եւ անգիտութեամբ,
թողութիւն շնորհեա մեղաւորիս,
զի ի ծննդէնէ սուրբ աւագանին մինչեւ ցայսօր
մեղուցեալ եմ առաջի աստուածութեանդ քո զգայարանօք իմովք,
եւ ամենայն անդամօք մարմնոյս.
եւ ողորմեա քո արարածոց եւ ինձ բազմամեղիս:

Թ

Ամենախնամ Տեր, դիր պահապան աչաց իմոց
զերկիւղ քո սուրբ ո՞չ եւս հայիլ յայրատ,
եւ ականջաց իմոց՝ ո՞չ ախորժել լսել զբանս չարութեան,
եւ բերանոյ իմոյ՝ ո՞չ խօսել զսուտութիւն,
եւ սրտի իմոյ՝ ո՞չ խորհել զչարութիւն,
եւ ձեռաց իմոց՝ ո՞չ գործել զանիրաւութիւն,
եւ ոտից իմոց՝ ո՞չ գնալ ի ճանապարհս անօրէնութեան,
այլ ուղղեա զչարժումն սոցա լինել միշտ ըստ
պատուիրանաց քոց յամենայնի.
եւ ողորմեա քո արարածոց եւ ինձ բազմամեղիս:

Ժ

Չուր կենդանի Քրիստոս, գիւր սիրոյ քո գոր արկեր յերկիր,
բորբոքեա յանձն իմ, զի այրեսցէ զաղտ հոգւոյ իմոյ,
եւ սրբեսցէ զխիղճ մտաց իմոց,
եւ մաքրեսցէ զմեղս մարմնոյ իմոյ,
եւ վարեսցէ լոյս գիտութեան քո ի սրտի իմում.
եւ ողորմեա քո արարածոց եւ ինձ բազմամեղիս:

ԺԱ

Իմաստութիւն հօր Յիսուս, տուր ինձ իմաստութիւն
զբարիս խորհել եւ խօսել եւ գործել առաջի քո յամենայն ժամ.
Ի չար խորհրդոց, ի բանից եւ ի գործոց փրկեա զիս.
եւ ողորմեա քո արարածոց եւ ինձ բազմամեղիս:

ԺԲ

Կամեցող բարեաց Տէր կամարար,
մի՞ թողուր զիս ի կամս անձին իմոյ գնալ,
այլ առաջնորդեա ինձ լինել միշտ ըստ կամաց քոց բարեսիրաց.
եւ ողորմեա քո արարածոց եւ ինձ բազմամեղիս:

ԺԳ

Արքայ երկնավոր, տուր ինձ զարքայութիւն քո
զոր խոստացար սիրելեաց քոց,
եւ զօրացո զսիրտ իմ ատել ըզմեղս,
եւ սիրել զքեզ միայն, եւ առնել զկամս քո.
եւ ողորմեա քո արարածոց եւ ինձ բազմամեղիս:

ԺԴ

Խնամող արարածոց, պահեա նշանաւ խաչի քո
զհոգի եւ զմարմին իմ ի պատրանաց մեղաց,
ի փորձութեանց դիւաց, եւ ի մարդոց անիրաւաց,
եւ յամենայն վտանգից հոգւոյ եւ մարմնոյ.
եւ ողորմեա քո արարածոց եւ ինձ բազմամեղիս:

ԺԵ

Պահապան ամենայնի Զրիստոս,
աջ քո հովանի լիցի ի վերայ իմ,
ի տուէ եւ ի գիշերի,
ի նստիլ ի տան եւ ի գնալ ի ճանապարհ,
ի ննջել եւ ի յառնել,
զի մի երբեք սասանեցայց.
եւ ողորմեա քո արարածոց եւ ինձ բազմամեղիս:

ԺԶ

Աստուած իմ, որ բանաս զձեռն քո,
եւ լնուս զամենայն արարածս ողորմութեամբ քով.
քեզ յանձն առնեմ զանձն իմ.
դու հոգա եւ պատրաստեա զպէտս հոգւոյ եւ մարմնոյ իմոյ
յայսըմիտետ մինչեւ յաւիտեան.
եւ ողորմեա քո արարածոց եւ ինձ բազմամեղիս:

ԺԵ

Դարձուցիչ մոլորելոց, դարձո զիս
ի չար սովորութեանց իմոց ի բարի սովորութիւն,
եւ բեւեռեա ի հոգի իմ զսոսկալի օր մահուն,
եւ զերկիւղ գեհենոյն, եւ զսէր արքայութեանն,
զի զղջացայց ի մեղաց, եւ գործեցից զարդարութիւն.
եւ ողորմեա քո արարածոց եւ ինձ բազմամեղիս:

ԺԸ

Աղբիւր անմահութեան, աղբերացո ի սրտե իմմէ
զարտասուս ապաշխարութեան որպէս պոռնկին,
զի լուացից զմեղս անձին իմոյ
յառաջ քան զելանելն իմ յաշխարհես.
եւ ողորմեա քո արարածոց եւ ինձ բազմամեղիս:

ԺԹ

Պարգեւիչ ողորմութեան,
պարգեւեա ինձ ուղղափառ հաւատով, եւ բարի գործով,
եւ սուրբ մարմնոյ եւ արեան քո հաղորդութեամբ գալ առ քեզ.
եւ ողորմեա քո արարածոց եւ ինձ բազմամեղիս:

Ի

Բարերար Տէր, հրեշտակի բարւոյ յանձն արասցես զիս
քաղցրութեամբ աւանդել զհոգի իմ,
եւ անխռով անցուցանել ընդ չարութիւն այսոցն,
որ են ի ներքոյ երկնից.
եւ ողորմեա քո արարածոց եւ ինձ բազմամեղիս:

ԻԱ

Լոյս ճշմարիտ Քրիստոս, արժանաւորեա զիոզի իմ
ուրախութեամբ տեսանել զլոյս փառաց քոց ի կոչման աւուրն,
եւ հանգչել յուսով բարեաց յօթեւանս արդարոց
մինչեւ յօր մեծի գալստեան քո.
եւ ողորմեա քո արարածոց եւ ինձ բազմամեղիս:

ԻԲ

Դատաւոր արդար, յորժամ գաս փառօք հօր դատել
զկենդանիս եւ զմեռեալս,
մի՞ մտաներ ի դատաստան ընդ ծառայի քում,
այլ փրկեա զիս ի յաւիտենական հրոյն,
եւ լսելի արա ինձ զերանաւէտ կոչումն արդարոց յերկնից արքայութիւնդ.
եւ ողորմեա քո արարածոց եւ ինձ բազմամեղիս:

ԻԳ

Ամենողորմ Տէր, ողորմեա ամենայն հաւատացելոց ի քեզ,
իմոց եւ օտարաց, ծանօթից եւ անծանօթից,
կենդանեաց եւ մեռելոց.
շնորհեա եւ թըշնամեաց իմոց
եւ ատելեաց զթողութիւն որ առ իս յանցանացն,
եւ դարձո զնոսա ի չարեացն զոր ունին վասն իմ,
զի ողորմութեան քում արժանի եղիցին.
եւ ողորմեա քո արարածոց եւ ինձ բազմամեղիս:

ԻԴ

Փառաւորեալ տէր, ընկալ զաղաչանս ծառայիս քո,
եւ կատարեա ի բարի զխնդրուածս իմ,
բարեխօսութեամբ սրբուհւոյ Աստուածածնին,
եւ Յովհաննու մկրտչին, եւ սրբոյն Ստեփանոսի նախավկային,
եւ սրբոյն Գրիգորի մերոյ լուսաւորչին,
եւ սրբոց առաքելոց, մարգարէից, վարդապետաց,
մարտիրոսաց, հայրապետաց, ճգնաւորաց,
կուսանաց, եւ ամենայն սրբոց քոց երկնաւորաց եւ երկրաւորաց:
Եւ քեզ փառք եւ երկրպագութիւն անբաժանելի սուրբ Երրորդութեանդ,
յաւիտեանս յաւիտենից. ամէն: